



Број/Број: **03/1-50-1-7-55/09**
Сарајево/Sarajevo, 5.7.2010.

ČLANOVIMA ZAJEDNIČKE KOMISIJE ZA ODBRANU I SIGURNOST BiH

Z A P I S N I K

55. sjednice Zajedničke komisije za odbranu i sigurnost BiH Parlamentarne skupštine BiH, održane 5.7.2010., u vremenu od 9,30 do 11,30 sati

Sjednici su prisustvovali sljedeći članovi Zajedničke komisije: Šefik Džaferović, Slobodan Šaraba, Mirko Okolić, Ivo Miro Jović, Selim Bešlagić, Drago Kalabić, Hazim Rančić i Adem Huskić.

Sjednici od članova Zajedničke komisije nisu prisustvovali: Branko Zrno, Vinko Zorić, Dušanka Majkić i Sulejman Tihć.

Sjednici su prisustvovali i gosti, predstavnici medija, kao i predstavnici Sekretarijata Parlamentarne skupštine BiH:

- Boško Šiljegović, parlamentarni vojni povjerenik BiH,
- Sadik Ahmetović, ministar sigurnosti BiH,
- Mirko Lujić, direktor SIPA-e,
- Almir Džuvo, generalni direktor OSA-e,
- Christian Haupt, USAID PSP u BiH,
- Jasna Dragičević i Samir Bašić, Misija OSCE-a u BiH,
- John Olsen i Lejla Hadžihasanović, Štab NATO-a u Sarajevu,
- Zoran Brkić, Sektor za odnose sa javnošću PSBiH,
- Željko Grubešić, stručni savjetnik, i Jovica Katić, stručni saradnik u Zajedničkoj komisiji za odbranu i sigurnost BiH.

Sjednicom je predsjedavao **Šefik Džaferović**, prvi zamjenik predsjedavajućeg Zajedničke komisije za odbranu i sigurnost BiH.

U okviru rasprave o dnevnom redu podsjetio je prisutne članove da je ova sjednica zakazana u skladu sa zaključcima s 54. sjednice Zajedničke komisije, sa sljedećim

DNEVNIM REDOM

1. **Razmatranje prispjelih informacija u vezi s terorističkim napadom u Bugojnu, 27.6.2010.**
2. **Tekuća pitanja:**
 - a. **Informacija o održanom sastanku s generalom Michaelom Lollesgaardom, 30.6.2010.**

Ad.1. Razmatranje prispjelih informacija u vezi s terorističkim napadom u Bugojnu, 27.6.2010.

Šefik Džaferović naveo je da su do danas Ministarstvo sigurnosti BiH, SIPA, OSA, Federalni MUP, te Tužilaštvo BiH Komisiji trebali dostaviti informacije u vezi s terorističkim aktom koji se dogodio u Bugojnu 27.6.2010. Napomenuo je da je Komisija do početka održavanja sjednice dobila samo informaciju Federalnog MUP-a o ovom događaju, te informirao članove Komisije da je na ruke predsjedavajućeg Branka Zrne, posredstvom Odjela pisarnice PSBiH, prispjela i informacija OSA-e, koja je označena stepenom tajnosti „povjerljivo“. S tim u vezi otvorio je raspravu o predloženom dnevnom redu.

Mirko Okolić konstatirao je da Komisija na ovoj sjednici treba otvoriti raspravu o prispjelim informacijama, s obzirom da su one dostavljene u skladu s 5. zaključkom koji je Komisija usvojila na prošloj sjednici. Ipak, predložio je da se prilikom razmatranja informacije OSA-e sa sjednice isključi javnost, odnosno sva ona lica koja nisu prošla proces sigurnosne provjere za stepen tajnosti „povjerljivo“. Informaciju Federalnog MUP-a ocijenio je neozbiljnom, cijeneći da je Komisiji na razmatranje upućena istovjetna informacija koja je nekoliko dana prije toga predočena sredstvima informiranja.

Slobodan Šaraba konstatirao je da bi se sa OSA-ine informacije trebala skinuti oznaka povjerljivosti s obzirom na hitnost rješavanja ovog problema, te obaviti jedinstvena rasprava o ove dvije informacije s obzirom na činjenicu da o ovom terorističkom aktu nadležne institucije trebaju hitno reagirati.

Adem Huskić konstatirao je da nadležne institucije nisu na adekvatan način tretirale zaključke s prošle sjednice Komisije, ne reagirajući na način na koji se to od njih očekivalo. S obzirom da on živi u Bugojnu, naveo je da su policajci ogorčeni radom policije u tom gradu, te je u skladu s tim predložio nekoliko zaključaka.

Drago Kalabić ocijenio je nedostavljanje informacija od institucija od kojih su zatražene odrazom nemoći i nezainteresiranosti države BiH za ovaj problem. Naglasio je da je ova sjednica Komisije i zakazana da bi se ovom događaju dao značaj. Država se u vezi s tim nalazi u katastrofalnoj situaciji i još je gora reakcija državnih tijela. Rekao je da institucije BiH očigledno nemaju odgovor kada je u pitanju rješavanje ovog problema, s obzirom da nekolicina institucija nisu dostavile traženu informaciju, te ocijenio da na osnovu dostavljenih informacija uopće ne postoje uslovi da se vodi rasprava o ovoj tački. U svojoj diskusiji iznio je kritiku na račun tužilaca, navodeći da o ovom aktu nisu izvijestili vlasti BiH. Zaključio je da je u pitanju veoma ozbiljan problem i da niko u BiH nema pravo da se prema njemu odnosi neozbiljno. Još je istaknuo da je, prema navodima medija, jasno da ovaj cjelokupni događaj iza sebe ima određene političke konotacije, te zaključio da neće učestvovati u

daljnjem radu Komisije po ovom pitanju ako uistinu ne bude konkretnog dogovora kako bi se ovaj problem u konačnici riješio.

Sadik Ahmetović, ministar sigurnosti BiH, naveo je da je on na sjednicu donio nepotpunu informaciju Ministarstva sigurnosti BiH u vezi s ovim pitanjem, cijeneći da kvalitet potpune informacije ovog ministarstva prvenstveno zavisi od sublimata informacija drugih sigurnosnih agencija koje budu dostavljane ovoj instituciji. Još je naveo da se Ministarstvo sigurnosti BiH treba suočiti s ovim problemom, ali i podsjetio na nemogućnost suočavanja ministra sigurnosti s njim usljed nedostatka njegove operativne nadležnosti.

Slobodan Šaraba je u svojoj ponovnoj diskusiji naveo da je na osnovu dosadašnje rasprave jasno da Komisija danas nema osnova za kvalitetnu raspravu. S tim u vezi predložio je da Komisija zatraži od Ministarstva sigurnosti BiH da u saradnji sa svim drugim policijskim agencijama u BiH izradi konkretan prijedlog mjera u vezi s pitanjem rješavanja ovog problema, u roku od pet dana, a koji bi bio razmatran na narednoj sjednici Komisije za sedam dana, te nakon toga upućen domovima PSBiH.

Ivo Miro Jović podsjetio je na hronologiju događanja kada su u pitanju teroristički napadi u BiH u posljednjih nekoliko godina, cijeneći da je i u vezi s ovim posljednjim riječ o direktnom udaru na državu BiH. Naveo je da je prvenstveno koordinirajuće tijelo, sastavljeno od predstavnika nekoliko institucija BiH, trebalo dati informaciju o ovom događaju, te naglasio da bez međusobne koordinacije tih institucija nema ni kvaliteta rada. Zaključio je da Zajednička komisija na ovoj sjednici nije u mogućnosti zauzeti stav, s obzirom da usljed nedostatka ključnih informacija uopće ne postoje elementi za rad.

Selim Bešliagić ocijenio je da se na ovoj sjednici Komisije treba raspravljati o dostavljenim informacijama, te naveo da su njegova očekivanja u pogledu dostavljanja ovih informacija bila da će Komisiji biti dostavljen prijedlog mjera koji su usaglasile ove institucije. Konstatirao je da se osjeća prevarenim jer je u posljednjoj informaciji o stanju sigurnosti navedeno da u BiH nema terorizma, nakon čega je uslijedio događaj u Bugojnu. S tim u vezi podržao je prijedlog zaključaka kojim se zahtijeva prijedlog mjera u borbi protiv terorizma, uz zahtjev da o njima raspravu obave i domovi PSBiH. Insistirao je da se ubuduće poboljša saradnja između ključnih institucija sigurnosti u BiH u borbi protiv terorizma.

Hazim Rančić podsjetio je da institucije nisu ispoštovale stav Zajedničke komisije prezentiran kroz zaključke s posljednje sjednice, održane prije sedam dana. Također, naveo je da nije zadovoljan činjenicom da niko iz Tužilaštva BiH nije prisutan ovoj sjednici. Ocijenio je da na raskrinkavanju svih elemenata ovog krivičnog djela Tužilaštvo BiH treba raditi sistemski zajedno sa svim policijskim agencijama u BiH, te podržao prijedlog da Ministarstvo sigurnosti i sigurnosne agencije trebaju napraviti prijedlog sistemskih mjera, koje bi predočile Zajedničkoj komisiji za odbranu i sigurnost BiH i domovima PSBiH. Još je podsjetio da je na sljedeću sjednicu potrebno ponovno pozvati ministra sigurnosti, direktore SIPA-e i OSA-e, te federalnog ministra unutrašnjih poslova i direktora Federalne uprave policije, kao i glavnog tužioca BiH, kako bi se dobila konkretnija informacija o dešavanjima u Bugojnu, kao i informacija o mjerama koje su preduzele ove institucije nakon tog događaja.

Sublimirajući dotadašnju raspravu **Šefik Džaferović** naveo je da Zajednička komisija mora imati svoj stav povodom ovog događaja. Također, naglasio je da svoj stav o njemu moraju imati i sve nadležne institucije, koje su dužne svoje informacije u vezi s tim dostaviti Parlamentarnoj skupštini BiH. Tako država BiH mora imati prijedlog mjera koji će služiti u

budućoj borbi protiv terorizma, a taj prijedlog mjera Zajedničkoj komisiji treba da predloži Ministarstvo sigurnosti. S tim u vezi zamolio je ministra sigurnosti da odgovori članovima Zajedničke komisije da li je realno očekivati da Ministarstvo sigurnosti sačini navedeni prijedlog mjera do petka, kako bi bio razmatran na narednoj sjednici Zajedničke komisije za sedam dana, a nakon toga i na sjednicama oba doma PSBiH.

Sadik Ahmetović, ministar sigurnosti BiH, ponovno je podsjetio na nedostatak operativnih nadležnosti ministra sigurnosti, u skladu s važećim zakonskim propisima, te rekao da će Ministarstvo sigurnosti u ovom roku razmotriti i predložiti Komisiji sve mjere koje se nalaze u njegovom domenu.

Po okončanju rasprave Zajednička komisija je s pet glasova „za“, jednim glasom „protiv“ i jednim „suzdržanim“ glasom usvojila sljedeći **zaključak**:

1. Zadužuje se Ministarstvo sigurnosti BiH da u saradnji s policijskim i drugim agencijama u BiH, OSABiH i Tužilaštvom BiH, u svjetlu posljednjeg terorističkog napada u Bugojnu, izradi prijedlog mjera radi sprečavanja ovakvih i sličnih slučajeva, te da ga dostavi u roku od pet dana (do 9.7.2010.).
2. Zajednička komisija za odbranu i sigurnost će na sljedećoj 56. sjednici, koja će biti održana 12.7.2010., razmatrati prijedlog mjera koje dostave ove institucije i svoje mišljenje u vezi s njima proslijediti domovima PSBiH na daljnje razmatranje i usvajanje.

Ovim je realizirana ova tačka dnevnog reda.

Ad.2. Tekuća pitanja

- a) **Informacija o održanom sastanku s generalom Michaelom Lollesgaardom, 30.6.2010.**

Zajednička komisija primila je k znanju Informaciju o sastanku s generalom Michaelom Lollesgaardom, koji je održan 30.6.2010.

Sjednica je završena u 11,30 sati.

Zapisnik sačinio

Jovica Katić

Prvi zamjenik predsjedavajućeg

Zajedničke komisije

Šefik Džaferović

Dostavljeno:

- naslovu
- a/a